



Mata Vengpi Kochuam Nau Hual Kikhawpna ah pangte

To,

If undelivered please return to - Manipur Area Office,
P.O. Box - 107
D. Phailian,
Churachandpur - 795128
Manipur, India



ESTD. MARCH 2008
DECEMBER 2021

Monthly Christian Magazine

Hinna Vâk

AN ORGAN OF THE MIZORAM PRESBYTERIAN CHURCH SYNOD, MANIPUR AREA



KHRISMAS CHIBAI BUKNA

- KÛT Lopi Pen
- Chibai Bukna Dik
- Dawitelna Mak leh Lamdang

BETHLEHEM AKSI A VAK KIT TAI

HinaVak simtu zosia Khrismas chibai.

Kum 2000 masang lai a khan khawsak lam (Persia) gam hi ah kigen a chun Aksi lamdang tak chu mu a hia. Zia hun lai a chun khawsak miching (Astrological scientist) pathum chun a hun zui ua, Judai gam Bethlehem khua a hung zui tung ui. Bethlehem ah gan in tawmtak chung a chun sawtpi a ding den hi a ki ti'i. Aksi kilat a kipat kum 1910 vel a tin a khan Manipur thingtang gam lama i pi leh pu teu hawn le zia Aksi lamdang hi ginna mit in a la mu thei tau in, kipakpi leh limpi in laphuaktu tenle a lachawi hial tau a hi.

I pi leh pu teu in zia Aksi lamdang a la ngaitua pat ua kipat kum 100 a liam tiang inle nang leh kei lungthim ah a bei thei nai diak puai. Bang ziaakah zia Aksi hin lulna nei bik a diam aw? Bang dang ziaak a hi puai: lei leh van siamtu Van Lal Chapa chuh mihing ah hung chang in, gan in ah tawm takin a hung piang hi ti a etsak ziaak a hi. A thinlung Bethlehem Aksi'n a salvak tâk te chu Khrismas a hung hi takleh a thakin a hung vâkdawk kit sek hi ti a kichian hi.

Tukum Khrismas a hin kua ahem khat bekin a mu thei dingin eimau ah Aksi lamdang um khale vâkdaw sak gaw leu hen ti i kidawisak a hi. Van Lal Chapa chun Aksi vâk kilat na ding in bang a bawl em? Kingaitawm takin Vanmi hilai chu leimi a hung chang ah, tâwmtak in gan in ah a piang hi. Eimau ah Aksi vâk a kilat thei na ding in tuchung Khrismas ahin kalbi khat bek la kumsuk ngam diam?



KOCHUAM HUANG

Nau hual kikhawp

Sunday School Kikaihuaina Bung 9na dungzui a hin Nau hualna hi kochuam tin in matchiat sek ding a ngai ahi. Tukum 2021 a hin Jubilee kochuam leh Mata kochuam a pat in Nau hualna program hawi tak ah a mat thuu dawn a hia, kipak a um ma ma hi. Kumkit lam ahin chu kochuam tin in i mat chiat tak ding uh ki neppi a hi.

Khrysmas Album

Manipur Area Office in Vaiphei pau ah Khrysmas la ngai pawimawna liantak neiin, hun sawt tak a la buaipi a. Manipur Area Official YouTube Channel panlakna zalin Khrysmas album chu YouTube ah ethei dingin a hung um ta, kipak a um khawp mai hi.

Zia album a lawtin theina ding ah theitawp ah pan ei lakpiak Upa Genlallian, Hilltown leh Tv. Songliansang O/A Area Office te kipiakna

ngai san aum khawp mai bawp hi. Chuleh Artist teldaw ah um te chu:

(1) Tv. S. Kailianmang, Jubilee Kochuam

(2) Pi Tingneu, Munpi Kochuam

(3) Pi Kimnunthiam, Hilltown Kochuam

(4) Nk. Hatsi, Pengjang

(5) Nk. Mary Vaiphei, Centenary Kochuam

(6) Nk. Rosni Khaute, Jubilee Kochuam

(7) Manipur Area Choir
te hawn theitawp ah hung kizil in November 18, 2021 zan a khan album latna Office Compound ah lawting taka mat zaw a hi tai.

Zia hun ahin Upa H. Ronghaka General Manager PRESCOM Board in le ei hung uap thei ah Rev. R. Lalhminganga AS in released a bawl hi.

Intensive Pastoral Care and Counseling

Mizoram Synod nuai ah pastor te zosian a palthen ngei ngei sek uh Intensive Pastoral Care and Counseling hi kum

Hin̄na Vâk

sin leh mi 10-20 kikal vel
kokhawm ah Family Guidance
and Counseling ah semtute hin
training a la piak sek uh a hi.
Zia hi Manipur Area pastor
te a la kipang kha nailo a hi
ziakin pan ve ding dawina aum
ah, dawtna siam a hi nungin
December 16-21 sung a hin
Thangkai Lungpau Hall ah ei

neipi ding a hiu. Zia hun ah
puitu ding te chu

(1) Rev. Lalsangbera, Director
FG&CC

(2) Rev. Lalnuntluanga (Pastor
Joseph pa),

(3) Rev. Zothansanga,

(4) Upa Lalmalsawma leh

(5) Upa F. Lalremthanga te hi
ding a hiu.

Synod lam thu

Pathian lungsiatna zalin kum a tawp tawh kitawnin hotu
lian lam term le a tawp sau sau ta, 2022 ah mawpuakna kitheng
danglam ding khenkhat vak taklang hi tiu:

1) Moderator : Rev. Prof. Vanlalnghaka Ralte

2) Senior Executive Secretary : Rev. C. Zoramawia

3) Executive Secretary : Rev. V.L. Luaia Hran leh
Rev. Dr. K. Lallawmzuala

4) Mission Board Secretary : Rev. R. Lalhminganga

5) Administrative Secretaries-

Manipur Area, CC Pur : Rev. PB Zosapthara

Sim Area, Lunglei : Rev. H. Lallianzara

Barak Area, Silchar : Rev. Lalrintluanga Ngente

6) Principal ATC : Rev. Dr. Tlanghmingthanga

7) Principal MTC : Rev. Dr. C. Lalramchhana

8) Director Synod Hospital : Dr. Lalthakima

9) Synod kikhawmpi 2022 : Khatla Kochuam Biak In

**MANIPUR AREA PASTOR LEH PRO PASTOR TE UMNA
SIAMLEM CHULEH PRO PASTOR THAK TE UMNA DING
GUAT DAN**

Sl. No. Min	Tu ah umna	Umna ding
1) Rev. Summinlian	Delhi	Sugnu
2) Rev. C. Lalngaihawma	Sugnu	Tlabung Chawnpui
3) Rev. Malakia Lalnunfela	Mata	Luknow East
4) Rev. Hesei Vaiphei	Leilon	Area Office
5) Rev. Eric Lienlalmuon	Leijangphai	DTh. Zil ding
6) Rev. Lallunglian	Mata	Leijangphai
7) Rev. Khuplemlal	Lamka	Leilon
8) Rev. Vanlalchhuanga	Karbi	Lamka
9) Rev. Andrew L.R. Khiangte	Chawngte P.	Mata
10) Rev. Khupneithang	Langgol	Delhi
11) Rev. Zuankhomang	Tungchyo	Tungchyo
12) Rev. Thangliansang	Namphalong	Namphalong
13) P/P T. Lalgin Vaiphei	Sugnu	D. Phailian
14) P/P Genlemthang Suantak	Jubilee	Mata
15) P/P Lamgolian Hatlei	Bethany	Kangvai
16) P/P C. Kailianson	Gangpimuol	Imphal

KHRISTMAS CHIBAI BUKNA

Pathian umpina leh kaihuaina zal in December tha i kilangkai tau a. Khristmas lim leh kipak tak a mang chiat ding in kochuam member zosia chibai ka hun buk hi.

Tukum sung in sungkuan bang a h'em zat te'n i ngainat ma ma teu i s'un ua. Lungthim na takah i um ginchat a um hi. Himaleh Lal Jesu hung pian lawp hun a hin thanmual lam ngen ah lungthim kawi lo in, Bethlehem lam zawk nga ham ham hitiu. Midangte le gitlona'n i mimal hinkhua leh sungkuan hung subuai ma ma maithei in ah. Himaleh, Bethlehem ah nau hung piang lam zawk thil zaw dingin kisingsa hitiu, ama chu Lemna Lal, Counsellor lopitak a hia, i kiang ua um zing Immanuel a hi kit hi. Zia Jesu chu mitin thinlungah leh sungkuan tin in hung piang thak kit hen la, zia chu Khristmas diktak chu hung hi ding a hi.

Zia hun hi khawvel takah mat thei a hia. Himaleh khawvel nawpchenna mai ah mat chu Khristmas a hi pua, Khristmas diktak chu nausen Jesu hung piang tawh thagau ah kipawlkhawmna hi a hi. Lalpa dawidan ah lim leh kipak tak ah, thamuang tak ah mang dingin pan la chiat hitiu.

Rev. R Lalhmingsanga
Administrative Secretary, Manipur Area

December 2021

KÛT LOPI PEN

(*Johan 3:16; Isai 9:6.*)

~ *Rev Kamkhotithang Neihzial*
i/c S. Kawtlian Pastor Bial

Gen hawнна

Bible ahin Kût tampi a um a, mat dan leh mat zia k chuam chiat a nei chil chel hi. Zia chu mimal, insung, nam leh gam khat huap dingah mat sek ala hi. Khawêl pumpi a huap lo a hi. Manipur ah ei thingtangmiten i ngaisan pen uleh Manipur Govt in ei hiatpi leh restricted holiday tiang ei puang piak, kum chenga i mat sek u chu Chin-Mizo- Kuki KÛT hi a hi. Zia Kût hi kisuklimna, nam chuam chuam kipumkhatna ding leh a dang dangte ngimna dingin mat sek a hi. Maleh, chanlam bei hiala i matzaw sek hun uh a tam hi. Ei thingtang mite a dingin a lopi pen leh thupi pen himaleh mi zosia a huap zo pua, mi zosia'n a hamphat pi pua, ziaziakachun a gensia lawi ding, a thasia leh a nuak ding tawh bei lo, buaina tung gen zui tamtak a um sek hi. Tuni a i thupi ding uhi chu zia a chung a i gen gual Kût hilo, Jesu Khrista'n mi zosia huap ding leh hamphatpi suak kei dingah a siam, KÛT lopi pen a hi.

Kût lopi pen

Gingtute a dingah Kût lopi pen chu Pathianin a chapa Jesu Khrista mangcha' "Khrista Luai" (Khristmas) ah'em "Khrista hiat zingna luai" a hun the hih a hi. "Khrista pian Champha Lawpna luai" le tithei a hi kit baw k hi. Zia Luai hi a hung kipatna bulpi chu "SUALNA/GILTONA" a hi. Zia giltona zia k hin mihingte mangthai ding in i

um tau a. Ziaziakachun, Lalpa Jesu Khrista chu khawêl ah mi gilote tan dingin a hung kipia ta a hi (Johan 3:16). I matna zia k pen tak uh chu Pian Champha lawm hiloin, Pathian chapa, Lal Jesu Khrista khawêl hukdam dingah ahung pianna hi a hi (Lk. 2:11). Kût lopi pen ahina zia k chu:

i) Mi zosia huap a hi: Thuthung Lui hun in Kût tam tak mat a la

Hin̄na Vâk

hi. Etsakna'n-Chiakan Kût chu Israelte a ding bik a mat sek a hi. Ziagual chun Kût tam tak mat a umte le nambing, gambing bep a huap hi. A chang pha lo leh a huap phak lo tam tak a um hi. Lalpa Jesu'n Bethlehem Bawng Inah Luai a hun the hi chu- a neu alian, a hau a zawng, mi zosia khenchuan neilo in a huap vek a, a chang phalo a um pua, khawvêl pum-pi a huap suak kei a hi.

ii) Chanchin pha kipak um a hi: Khawvêl ahin nisin in chanchin pha hiat ding a tam hi. Lawtinna thute, malzawlna chuam chuam dawnna thute, etc dawn ahi sek hi. Ziate hi ni khat a h'em, tha khat a h'em, kum khat a h'em, damsung a he'm a dai sek ah, khang 1/2/3/4 vel a dai zaw chun a sawt thei pen hin a. Khawêla chanchin phate hin chuai hun leh tawp hun a nei chiat hi. Maleh, Kût lopi pen ni ah Lal Jesu'n chanchin pha a hun tut hi chu a mang thei talo ding Chanchinpha a hi. A Luai ûm leh a taksan taphawtte chu mangthai loa kumtuang hinna nei ding a hiu (Johan 3:16). Kumtuang hinna chan theina Kût chu a lopi na lawm lawm e !

iii) Lalpa chibai a bukna Kût a hi: Khawêl Kût te ahin mihingte hin challang leh chawisanna a law sek u'i. Pathian a challang sek lo a hi. Kût Lopi a chun Lalpa "Chibai buk" ahi sek hi. Angelte chun Pathian pakna Lâ a hun sau a: "Chungnung pen ah Pathian chu lopi tak in um hen la, lei chung ah a dawisak ma ma mihingte kiang hin chamna um ta hen!" (Mt. 2:14) tiin Lalpa Chibai a buk u'i. Michingte'n Judate Lengpa ding hung piang a hiat phat un, "Khawi ah a hem Judate lengpa hung piang chu? Sualam ah a aksi chu ka muu ah, ama chibai buk ding ah hung ka hiu" (Matthew 2:2) tiin "Chibai" a buk masa pen u'i. Belamchingte chun nausen Jesu a mu'a a kile kit phat un, "Pathian chawihawi leh pak kawmin a chia kit tau hi" (Lk.2:20). Tuchung Khrstimas Ni hi Lalpa Chibai bukna Kût in mang hitiun Lal Jesu hi mun lailungpen lua sak hitiu !

iv) Kiphalna leh Thilpiakna Kût a hi: Kût tam tak kimatna ahin kuama a nei sun sun leh a theina zosia lân zo vek leh pia zo kei um khel puan a. Khris-ta'n luai a the, Kût lopi pen

mang masapente, Michingte leh Belampute chu kipakna'n a dim ua, "Kiphalna" lungthim a hun nei ua, thilpiak leh kipiakna'n a zui ngal a hi. Michingte'n Judate Lal hung piang chu a hawl leh mu dingin haksatna a thuak ngap u'i. A gamlat leh a nai in a kisubuai puau. Lal thak piang a mu phat un, itsik bangma neiloin a gobawmteu hawng in, a nei sun sun uh kipkana thilpiak-Sana, Begaw le Murra te Lal thak piang Chibai bukna'n a lân malam u'i. Belam chingte chun nausen Jesu a mu phat un thilpiak piak ding bangma a nei lo nalai uh a hi. Maleh, a nei sun uh a awu' in Pathian chawihawi in limtakin a kile kit ui.

Tuchung Khristmas hi kiphalna leh thilpiakna Kût in mang leu hin nawp a um hi. Hukdampa i nei ziak ua i kipaknateu suklatna dingin kiphaltakin thilpiak ten sulang hitiu. Midangte kiang tungpha Kût hingei dingin pan la thak hitiu. Bethlehem mun ah Pathian in a etsak Hepina chu Thilpiak a hi.

v) Kingaitawmna Kût a hi: Khawêl mite Lal a hilo ziaikin mun sang leh thupi têt loin a niam leh musit um pente le

huap zo dingin kingaitawmtakin, mihing a la pian khak ngailona leh pianna tâka le ngailona mun chu a hun têt hi. Khrista chu kingaitawmtakin mihing hina bukim a nei theina dingin a lopina zosia nusia in suak gual ah hung kihî'niam in mihing gualin a hun piang hi (Phi. 2:5-10). Hukdam ngai mihingte hukdawk dinga mihing ahung chan hi alopi takzet a hi. Mihing pangai dinmun sanga le niam jaw a hung kipat jiang hin mi nuainungpen pen te le a huapzo hi ti a taklang hi. Mari ngeiin le kingaitawmtakin "Lalpa suaknu ka hi, la thu gual gualin ka chung in tung ta hen" (Lk. 1:38) ati gualin ei unle tuchung Khristmas ahin kingaitawmna hinkhua thak tawh mang gua hitiu. Kingaitawmna hi malsawmna nâk a hi ti hezing hitiu.

vi) Chamna Lal a hi: Gam leh nam, khua leh khua, Kochuam leh Kochuam, khua hiang leh hei, insak-inthang, mimal hinkhua tiang huapin kichamlona hinkhua'n ei lua dim zo ta. Kichamlona hinkhua hi vang genthei um chu hingei in a. Khawêl sawrkal kizawm khawm UNO hile khawêlah

Hingna Vâk

chamna leh muanna a um theina ding ah hung ding dawk a hi. Gam bung tinin khatvei vak mek zeu ah khawêl suksiat thut theina Nuclear galthuamte a kikawl chil chel mai ua. Zia thil tizat umte hi ivak thil a hi chun, kichamna hi i pawimaw tak zet u'i. Kichamna pang lo hin sungkuan, khawtang leh nam gual ah i umkhawmna a susia, hinkhawm a hak sa, i lungmuang thei pua, genthei a uma, khawtang hinkhua, nek leh dawn, Sakhwana tiangin masawmna a um thei pua. Khristiante a ding vangin chamna leh muanna nei dingah pan lak leh sep hi ngainep thei ei pua, i bawl dinguh Mission nâ lopitak a hi zaw a hi. Ziaziakchun, Chamna Lalpa piakin i um tau a hi. Lei leh van in ei khendan sa, kicham talo chu Lal Jesu thisan ziakin a kicham kit ta (Kol. 1:20). Vanah thil umte leh leiah thil umte chu Khristaah kizawm khawmin ei kicham sak ta a hi. Zia chu Pa lunglam tak a hi. Khrista thisan chun Pathian melma hi sek kha, Pathian chate ah ei siam ta a hi. Chutichun Lal Jesu chu Chamna Lal a hung hita a hi (Isai 9:6).

Thukhakna

Khristian zosia dinga ni pawimaw tak khawêl gam bung chuam chuamte'n le a mat, Khristmas Ni- Hukdampa Jesu pian champha kumkhat sunga nibik pawimaw pen pen chu ahi ti leu hin gen khial khel lo ding ihu. Maleh, a ni leh a hun thu sanga pawimaw zaw Jesu Pathian chapa hi khawêl ahin a hung a, mihing taksa pu in, nungak thiangtho, Mari sungin ahung piang ngei hi ti hi a hi. Khawêl a migilote adinga i Hukdampau dinguh hung pian ni hi bang ziaka em i chanlo thei lo ding uh. Pathian awi lote haw na tiang inle zia ni hi'n a chawl sek u'i. I Khristmas mat dan uh leh i ngailul teu hi kietchian thak a kûl hi. Ginglo mite'n Van thak Festival or Luaithena Festival mang gualin ei ngai khanau. Khristmas ni ahin JESU sanga ngai pawimaw zawk di nei khai'tiu. Jesu pianni, December 25 ni i mat sek uhi a ni sang ahin JESU hi a pawimaw zaw a hi. Khristmas Ni Luaithena (An nekkhawmna) um lo ziaka Khristmas mang lo guala kingaina lungthim te kha paithak a hun tak zet ta'i. Pathian dawidan Kut Lopi pen in mang ta'itiu. Amen !

EI UN LE CHIBAI BUK HITIU

Mathai 2: 7-12

*Rev. Ph. Thianneilal, Mth. I
Aizawl Theological College*

Introduction: Jesu Khrista chu nungak thiangtho ah kipat a hung pian di chu Isai 7:14 ah kigen sukbukimna a hi. Ama chu Pathian a hia, Mary masangah a la um a hitai. Ziaziakachun, nausen dang gualah hung kizil lo a hi. Ama chu a hung piang hilo in “khawvel ah mihing gualah hung a hi zawi” (Johan 18:37). Ama chu mihing leh Pathian a hia, Gitlona neilo Pathian Belamno a hi (1 Peter 1:19). Mathai hin a lekhabu a hin a bul leh a tawpna’n “Pathian i kiangun a um” Immanuel tin a gen hi (Mat 1:23; 28:20).

Jesu pian ziak ah thil suak te:

1. Thilsiam ten Jesu pian vaidawn na’n aksi maktak van ah kilatsak in Lal thak khat a piang hi ti khawvel mite a hil ui (Kis 24:17).

2. Jentel ten Jesu pian lawpna’n thilpiak tam tak a hun piau a, a hun biau hi. Mathai hin a lekhabu a hin Jesu chu Jentelte leh Judate hukdam dingah hung a hi ti’n a gen hi. Mi chingte chu astrologer-scientist; vanlam umdan kipat thil suak ding ngaitua lawk te a hiu. Aksi chun Pathian thu in a puilut ua, Pathian thu chun

Hukdampa kiangun a puilut uh a hi (Sam 19). Pathian in i hiat thei dingun thu a gen sek hi.

3. Herod chun launa leh zuauthepna’n Jesu chu a la vaitut a. Ama chun a lalgam subuaitu di kuama a dawilo a hi.

4. Thiampu Lal leh lekha ziate chun thu diktak a dawng ua, himaleh a dawnhunau kha a dik puai. Amau chu mel 5 bep gamla um a hiu a, himaleh Jesu va ve ding a nuam puau hi.

Magi: Sualam Michingte chu Scientiste a hiu a, himaleh, hetna leh Pathian thu kitualona a he puau a, chutichun, thudik hawl leh hukdampa

Hiṅṅa Vâk

biak chule a kikalna a he puau. Christian diktak chun Lalpa chu a ngaituana leh lungthim in a bia thei hi (Mat 22:37). Albert Einstein chun “Science hi sakhua bei ah kengbai mai a hia; Sakhua chule science panglo in mitthum a hi” a la ti’i.

Herod kha BC 37 – 4 BC kikal ah Jerusalem gamkai ah Lal dingin Rome Lal chun a kawī hi. Michingte chu mang lê thiam, aksi leh van lam umdan hethiam, dawithiam, zoroastrianism, sualam ah kipat a hiu a, Persia, East Syria, Arabia ti vel a pat hung hi ding ua ginchat a hiu. Thilpiak pathum a piak ziakun mi pathum a kitia, thilpiak piate chu Caspar, Barthasar leh Melchior a hiu. Evangelist khenkhat ten mi pali a hiu in pakhat chu Altaba a hi a tiu hi.

Jacob chapa Joseph kha hukdamna siamdawktu, mang lê thiam, a inkuante Egypt gam ah puitu a hi. Jesu pa Joseph khale Joseph gual tho in a inkuante Egypt gam ah a hinna ding ua zampitu a hi. Mosi leh Jesu thusim hile kibang tak a hi.

Sualam michingte sakhua chu Zoroaster a hia dawithu mat phal a la hi puai. Amau chu vanlam aksi umdan ah kipat

thil khual dan thiam a hiu a; mang lê thiam le a hi bawk ui.

Chanchin Pha bute a hin sualam michingte kha mi bangzat a hiu em ti a gen chian puai. Kochuam masa Pate chun a thilpiak uh zilin Pathum a hiu ala tiu hi, Churches of the Orient te chun mi 12 a hi a tiu a; St. Peter and Marcellinus thân ah painting a chun mi 2 a ti kit a; Lateran Museum ah mi 3 a tia; Domitilla thân ah mi 4 a tia; Kircher Museum ah mi 8 a ti bawk hi.

Amau chun Syrian Desert kiti Euphrates leh Syria kikal ah um chu a hun pal theng ua Halleb/Tudmar a lut ua zia kipat chun Damascus south – Mecca lampi St. Maximus/Theodotus of Ancyna a hun haw malam pek ui. Sualam kiti hi Persia gam a hi (Media, Persia, Assyria, Babylon).

Persia leh Jerusalem chu 1000 – 1200 miles (1600 – 1920 Km) a gamla hi. A kipatdaw nau tawh zia kikal lampi chu sangawngsau ah kum 2 vel lut di a hi. Michingte’n a hung et nau hi naupang Jesu temple

ah a lat zaw nung uh a hi tai (Luke 2:13). A et zaw zaw un Joseph kianga vansawlwchâk in a hil gual in Egypt gam ah a taimangpi tai (Mt 2:13). Zia zaw a chun michingte chu Galilee lam in a kile tau (Luke 2:39).

Mi kitha thu kigente haw ah kipat a hin Michingte hung na hi Jesu pian zaw kum 2 nung hiding in Fathers te'n a gen ui. Jerusalem ah Jesu pianna mun a va tun niu chu January 6 a hia, zia chu a pianni (Birthday) zaw ni 13 channi a hi a kitii. Ziakiachun, Church of the Orient ten Xmas- January 6 ah amang sek ui. Occident ten vang December 25 in a mang sek ua, ei un le i mang sek uh a hi.

Kum ni lam lut ah aksi'n eipui ui (eidomen gar autou ton astera) Mat 2:2. Bang gual aksi a hi ta diam? Comet a hi ti lawi – a hipuai ti lawi a um, Jupiter leh Saturn kipeltua (7 BC) kha a hi ti lawi, Jupiter leh Venus kipeltua (6 BC) a hi tilawi- a dik puai ti lawi, ngaidan chuam chuam a um hi.

Sualam ah kipat chun a zui pek ua (Mat 2:9) a ti hin mun khat ah aksi chu a um den mai mai puai ti a kichian ma ma hi. Israelte puitu mei khuam zan ah pui sektu (Pdt 13:21); Pathian vâk (Luk 2:9), Vân ah pat Saul hun sal (Nas 9:3) vak gual kha a hi zawi.

(1) Mipilte'n kipakna thilpiak pia in nausen chibai a buk ui: Kum 2 lam lampi sau tak a hun jawt ua himaleh a kithalawp ma ma ziang ua, kipâkna thilpiak piak kal a ngakla ma mau hiin a kilang hi. Nausen Jesu a va mû mu un a mâah bawkkhup in chibai a buk ua, a thilpiak teu chu a lan tau.

Mi thiamte gen dan in thilpiak plate chu Noah suante a hiu. Caspar – Asia mi chun begaw a pia – Shem suan ah mi tangval a hi. Barthasar – Arabia mi chun murah a pia – Ham suan ah mi mivawm a hi. Melchior – Europe mi chun sana a pia; Japhet suan ah mi teksia khamul sau, sam buang tak nei a hi.

Amaw hin Jesu a mu zaw ua kipat in Jesu thu hiatpitu gi-

Hin̄na Vâk

num tak a hung hito zel tau a hi. Martal changte list kiziakna a chun hiti hin a kizik hi:

Caspar chu – January 1, ah a martal

Melchior chu – January 6, ah a martal

Balthasar chu – January 11, ah a martal hi tin a kiziak hi.

Jesu mutu leh chibai buku tak takte hin thichil in a hepi un, a ginum ma ma sek ui. Unau! Nangin Nausen Jesu chu la mu tam, chibai la buk ta em? Tukum hi Jesu i mu kum leh chibai i buk kum uh hi sak leu hin nawp a um tak zet hi. Michingte'n gamla takah kipat, thi leh hin, gilkiâl –dangchâk khawksa lo khawp ah Jesu a mu masiau a hun hawl tun tun uhi ettawn ah nei in Hukdampa chu thil dang zosia sangin i mamaw zawu ti hia'n mutei ding guan hawl tun tun mai hitiu. Zia chu i pawimaw ui.

(2) Belampute'n a belam teu nusia'n nausen chibai a buku ui:

Jesu pian chungchâng thu a kihil masapen chu belampute a hui.

Belampute hi society ah mi nuainung pen ah ngai a hui.

Mi zuauthei leh gucha – suammang tia gen a hi sek ua, Thutanna ah hetpitu ah mat tâk hilo a hui. Kichênna dân mat phalpiak a hi puau a, mithi-anglo ah ngai ahiu. Bang dingah Pathian hin Jesu pian thu a va hil masat pen a hi diam? Khenkhat gendan in “*a mau chu Leng David (belampu a la hi) kha tawh Jesu phunggui a kizawp ziak a hi*” a tiu a, khenkhat chun “Pathian in Jeremiah kiangah Belamputen a belam teu a ven lai un Hukdampa chu piang di a hi” (Jer 33:13) a ti kha guitunna dingahi a tiu. Ahinla Pathian in a ziak lopi tak a nei chu ‘Hukdamna hi mi zosia - milian leh mi nuainung te â di a hi’ ziak a hi.

Belampute chun mak a sau: Pathian lopina vâk chun a kimvel uh a salvâk ta. Misual leh mi thianglote'n vansawlchâk a mu tâk mai uh chu mak a sa

ma mau hi. Thu pawimaw tak hil a hi nalai set ua; ‘Nanguh â dingah hukdampa a piang tai” ti a hi. Ziabep chule hilo in vânsawlchâkte chun lâ a hun sa kit ua ‘Pathian lopi hen la, khawvelah a lungawinate chungah chamna leng taken’ a hun ti kit ui. Vânsawlchâkte pawt nung a chun belampute chu a chiau a, Bethlehem ah Mary leh Joseph in gankuang sungah a sial uh nausen Jesu chu a va mu tau hi. Tichun, Israelte kinepna hukdampa Lal Messiah piang chu a va mu’u a, bawkkhup in a taksau pumpi kilan in Jesu chu chibai a buk ua, a bia tau hi. Zia thu a chun kipâk talua’n mi a mu zosiau a hun hil malam pek tau hi. Zia kipat chun Pathian chawihawi in a hung kile kit ua, a dam sung siau in Pathian a biau a, hukdamtu khawvel ah a hung tai ti a hechian tau hi.

Unaute haw belampute chu belamte’n a nawp dan ua a um-sak thei lo gual un, nang leh kei hile gitlona’n ei hen tâng ua lalgam nasepna ah zalen lo takin ei siam uh a hi. Maleh Jesu chun i gitlo puak gik zo-

siau chu ‘ka chung in sep than keiman la khankhua dinguh ka gel nai a ti’. Jesu mu nuam ah hawlte chun a hinkhuau ah gitlona khau ei hentangte chu nusia in Jesu umna lam a zuan sek uh a hi. Unau, Jesu umna lam hi i hethei tau em? Zu dawr, angcha kapna, party leh kochuam program hilo kipawlkhawmna a hin Jesu va hawl i hi em? Khawi takin Jesu i muthei diam uh ngaitua in lungthim thiangtho pu’n ama lam zuan zel hitiu.

(3) Ei un bangti’n Jesu chibai buk di ihu em? Bang hem i piak uh, bang hem i nutsiau?

La phuaktu chun, “*I lungthim mun hawn chiat leu hin, Go thil dang a ngaina diak puai,*” a ti. Unau! nang leh kei hin sana, begaw leh mura chu chawi zo lo maithei ihi. Himaleh, *Aw Jesu tuni hin ka lunggil bawng inah, hung piang thak kit in nang ka kumtuang Lal ding un, Ka khut thiang lo hi Mary khut in ngai inla, kum khawtuang in kipâk tawp thei nawt ta puang ka.*” ti in Jesu lam ban in i lungthim pumpi, i

Hinna Vâk

hatna pumpi leh i theina pumpi'n ama â dingin kilan in ama chu bia'n chibai buk hitiu. Zia chu Jesu kipâkna pen hiding a hi. Rom 12:1 a chun i taksau hi kithawina thiangtho Pathian pawm tak ah kilan dingin ei dawî thu imû hi.

Tulai khristiante hin i taksau ahin Pathian i chawihawi thei ta lo uh hiin a kilang nasa ma ma tai. Jesu'n ka cha la lungthim ei pian a tia, lungthim hile Pathian biakna dingah chun a pawimaw mama khat chu a hi. Lungthim leh taksa pumpi Pathian chawihawi dingin Lalpan ei chial ui. Tuni hin Khristmas imat zing lai uh leh Jesu chibai ibuk zing lai un, i taksau leh i lungthim uh hi Jesu â ding in pia in, ama kiangin a nawp dan dan ah a mat ding in nusia ziang hitiu. Lalpa Pathian chun ei pui ngei in'a. JH Gilmore chun Pathian chibai buk na'n a hinna leh taksa leh lungthim a pia, Pathian in a pui zia a hechian ma ma a, lâ a phuak a, *"I Pathian in ei pui zing hi, ziachu hian ka thamuang ma mai, ka thei kham ah ka nasepna'n, ama*

khut in ei pui zing hi, Lau um leh lau um loah ama khut in ei pui zing hi; lungngai loin um ing ka, ama khut in ei pui zing hi. Ka thi hun tiang in zam loin Jordan lui ei puikai ngei di ahi; ei pui zing hi, ei pui zing hi" ti'n khristiante lapi a hung hita a hi.

Pathian in ei pui lo gualah i kihiat sek nau hi maw! Jesu chibai bukna Sualam miching ten sana, begaw leh murra a chawi ua, ziagual ah chun ei hawn i taksa leh lungthim Jesu i piak nawp lo zia kuh a'i ve. Lungthim leh taksa Jesu pia ta, khristiante chun Pathian chu Thagau leh thutak in a ho thei sek ua, Pathian a kipâk mama sek hi. Zia chu i biak dan di him uh a hi bawk hi. Lungthim khrista kianga pia lote chun khawvel thil chau a buaipiu a, Pa lopina a chang zo ngai puau. An mangthai ding buaipu nan lunggimna leh beidawanna'n a dim sek uh a hi. Ziaziakachun, unaute haw Jesu kipâkna leh Pathian bia tak tak dite chun Thagau leh Thutak ah lungthim leh taksa pumah Pathian biak di a hi.

Tu kum a hin i mihing lui – gitlona leh bawsiatna dim, Lalpa â dingah ten um takte chu nutsia gua hitiu in, thil thi-anglo chêp leh muam, zu leh khamthei dang dangte hi haisan in Jesu ma'h bawkkhup in ama chu chibai buk gua tiam hi

tiu. Tichun, ama hetpitu ginum tak chu hi di i hiu. Ka damlai hun chawmchate hi Lalpa a'n pia tang ka! Ti ah Lalpa chawihawi a, Jesu mu tak tak guatna lungthim nei chiat ding in Lalpa'n a thu ei maljawl piak ta hen, Amen!!

Khawtang Gucha leh Sawrkar Gucha kikhiatna bang a hi em?

1. Khawtang Gucha chun la sum, sakhau, gawhawri, sana khi leh a dang dang hun guk piak intin,

Himaleh Sawrkar Gucha chun la masang hinkhua, la career, la lekha simna, damtheina leh sumkawlveina hun guk piak ding a hi.

2. A nuizat umna laitak chu:

Khawtang gucha chun kua hi suam di ka hi em ti tel intin.

Hilele, nang hung suam dingin sawrkar gucha chu nang ma ma'n la kitel sek hi.

3. Kipawchanningkhaw na chu

Police in khawtang gucha chu del ah del in a man sek ua.

Hilele, sawrkar gucha chu hawitak ah enkawl in a vengbit sek ui.

Zia chu a hi tulaitak ah khawtang dinmun kilebul ah i khawsak dan uh.

Chuleh,

Muthei ma ma lo hingal in mitthum ka hi puai i vak ti nalaiset ui.

4. Zia zosia chung ah a ngawlhuai ma ma khat chu khawtang gucha chu do leh musit in i awmualpho ua, hilehle sawrkar guchate a dingin eih leh eih i kisuak sek ui.

KHRISTMAS CHUNGCHANG

*Rev. Eric Lienlalmuon
i/c Leijangphai Pastor Bial*

Khristmas kiti hi thumal pani kigawm khawm Khrist leh Mass a pat hung piang dawk a hi. Khrist chun Jesu a kawkah, Mass hi Lalpa zân an tina le mat a hikít hi. Gíngtu masate chun Lalpa zân an hi ankuang um khawmna pangai tak tak in a mang sek ui. Orthodox leh Coptic Kochuamte Khristmas mat ni leh ei haw Khristmas mat ni kibatlona ziaak chuh, Orthodox leh Coptic Kochuamte hin Julian Calender (Rome leng lopi Julius Caesar min pu ahi) a mat naklai ziakuh a hi. Tu hin chu khawvel pumpi ah a tamzaw te'n 'Gregorian Calender' (Pope Gregory XIII in kum 1582 ah ala tangzal ahi), i mang tau ah, zia calendar nisim dan dungzui in, Christmas ni hi kibang tak in 25th December in i mang chiat ta'u hi.

Christmas tawh kisai ah hiat ding pawimaw tamtak um in ah, ahin, a lengah genseng lo ding ihi ziaakin, pawimaw leh langsal diakah ka hiatte chawmchan vak en khawm hitiu.

(a) **Merry Christmas:** Christmas a hung nai tuam vel leh, Merry Christmas ti thumal mangin Christmas chibai i kibuk sau sau sek ua. Merry Christmas ti kampau hung kihiat patna hi 1534 kum ah John Fisher (English Catholic Bishop) chun Thomas Crom-

well kiti pa kiang ah Khristmas chibai bukna lekhathawt a thawtna pat hung kimang pan ahi. Tanglawn takah a hung kimat patna ahi leh 1843 kum in Sir Henry Cole in Khristmas Card a hung siama, "Merry Christmas and a Happy New Year" ti thumal a hung chuan sak a kipat in, tu tiang in i mang to zel ta'u a hi.

(b) **Advent Christmas:** Advent Christmas hi Christmas Ni a tun masang Pathianni li vei huam sung a huap hi. Mun

khenkhat a chun, December 1st kipata te, ahiloleh November 15th kipata Christmas Ni tiang bang huap sak sek lawi le aum ui. Advent Christmas in a tup pen chu ahi leh, a hungtung ding Jesu Khrista pianchamphaphak thil lawkna leh ki sak lawkna ahi pen hi.

Ei un Advent Christmas hi nunnapw leh an nek khawmna in i mang tangpi deu sek ua, Orthodox leh Eastern Orthodox Kochuamte leh Kochuam masa te'nan ngawl a pauchapna leh ankuang um khawmna te'n a mang sek ui.

(c). **25th December Christmas Ni:** I Bible in Jesu pianni leh tha chungchang a gen khakna mu ding aum pua. Aleh bang ti dan ah 25th December hi Jesu Khrista piani ngei guala i mat sek uh ahi diam le? Zia tawh kisai ahin ngaidan chuam chuam aum ah, saupi le sut thei in ah, ahin chawmkim tak in vak en khawm hitiu.

(i). *25th December ni ah Christmas ahung ki mat patna record mu thei tiang ahileh* 336 AD, Roman Emperor Constantine (Roman Emperor

Christian hi masa pen) lal lai ahi. Ama malakna ziaka 25th December hi Christmas Ni dinga namdet ahi ti ngaidan det tak nei pawl aum ui.

(ii). *Christian masate thil dan a chun*, Vansawlchak in Mary kianga nau vawp ding ahi thu ava tut ni kha March 25th ahia, tuni tiang in Kochuam tamtak in March 25th ni hi thupi tak in a lawm zing sek nalai uh ahi. March 25th (Mary nau vawp pat ni) kipat December 25thkikal hi tha kua chet ahia, Mary in nau thating kei in a vawp hi ti taklatna ahi kawm hi. Zia gual ah suut te dinga chun 25th December hi Jesu pianniti lo thei lo ahi. March 25th hi Christian masate dinga chun ni pawimaw tak khat ahi kit hi. Pathian in khawvel a siam pat ni kha 25th March hi ngei ding in a ging cha bawk ui. Chun Jesu Khrista thi ni kha le March 25th ma ahi ti'n ngaidan nei tamtak aum bawk ui. Ziaziakchun, Mary'n Jesu a vawp pat ni leh Jesu thi ni kha a ni leh tha ki bang chet ahi ti ahi kit hi.

(iii). *December 21st hi kumkhat sunga ni chawm ni pen leh*

Zan sawt ni pen ahi I hiat sau ahia. Christian masate hun lai ah gingo tute'n zia hun lak vel hi nunnawp leh awllen hun in ala mang sek ua, nek leh chak le a nian hun laitak ahi bawk hi.

Persia te chun 21st December hi 'Yalda (Yalda ti hi Pi-ang, Birth tina ahi). Night" or "Shab-e Chelleh" (Winter solstice) ti in, nunnawp, a nuam thei pen in hun a mang sek ui.

Rome te festival pawimaw pakhat Saturnalia hi December 17th leh 23rd ni in a pathian uh zana et sak na'n a mang sek ui.

Romte sui dan a chun, khaw vawt leh zan sawt zan pen hi December 25th ahia, AD 274 Emperor Aurelian hin 'Dies Natalis Solis Invicti' (Nisa (Sun) hat chungnung pi-anchampha) ahi ti in min ala vua hi. Zia ni chu thupi tak in December 25th ni in ala mang sek ui. Zia haw zia ahin mi tamtak chun 25th December, Christmas kimat ni hi gingo tu Romte festival apat lak dawk ahi ti'n ngaidan dawi umlo tak a nei khawlaw ui.

Zia chungchang ah hiat dinga pawimaw ma ma chu ahi

leh, Solis Invicti, Emperor Aurelian in ahun puakdaw hi kum zabi 12 (12 AD) vel a kipat hiat phak hung hi pan bep ahi. Zia Romte Festival hung piandaw kum 200 masang daih a Jesu pianni hi ding a ginchak, 25th December hi ngaidan (Mary in nau a vawp patni March 25th apat tha kua a tin ni December 25th) det tak ala hi zo kei ta ahi. Ziaziakachun, Christmas Ni 25th December hi ginglotute festival a pat kila sawn ahi ti thusut hi ki sukbuai sak ding ahi puai.

(d). **Christmas or Xmas:** Christmas leh Xmas ti hi a um-zia kibang ahi. Xmas vakti ahin ngai phatlo na ding bangma aum chuam diak puai. A chawm lam in vak gen le hin, Greek thumal 'X' hi Englisha chun 'Chi' ti ahia, English a 'Christ' hi Greek a chun 'Xpistos' ti ahi. Christmas hi thumal pani ki gawmkhawm Christ+Mass ahi dungzui in (Greek alphabet 'X' hi a chawm lamah 'Christos' tina mat ahi), a chawm lam aha zek phat tak ua leh Xmas ti'a a zik mai sek uh ahi.

KHRISTMAS CHIBAI

DAWITELNA MAK LEH LAMDANG

Bible simdi- Luka 2:12, IKorinth 1:27-29

Pi Ginlalthuamkim
Chairman CKNP

Simtu dawitak te. Amasa'n I Lalpa Jesu Krist min in chibai!

Hun leh phat Pathian khut ah um mangto zel in tukum 2021 ading ah tha nunung pen December tha tiang te bang Pathian in ei pui galkai to ta, i chenna khawvel ivak thil a, khawvel hipi Covid – 19 ziakin hun bangchan ahem kikhawm theilo in i um a. Zia bep chu hilo in zia hipi ziakin i khawsak dante te mumal taka chiathei lo hun tamtak a um hi. Chun, zia hipi ziakin mi tamtak a zawng a hau, aniam asang, ‘ama hi Pathian nasem tu ahia’ ti um chuam lo in mi sang tamtak te’n thina thanmual ei liamsan zo tau. Nei leh lam hau ziaka, solkal lam ah sepna sang tak nei ziaka, ahi lo leh Pathian nasem tu gin um hi ziaka dam ah khawvel mang nalai di ti hileh vang mi tamtak te dam nalai di’n gin chat a um hi. Ahin lah igen nawp pen chu, Pathian nasep na le afel leh agin um pen le ki hilo, sum leh pai nei leh lam ale mi nuai ah ki um. Ahin, tuni hin mi tamtak ten thina thanmual ei liamsan nung ua bang dinga ei dam nalai ? Pathian in bang hi ding in ei daw em ti hi i ki et thak na’u hileh anawp um hi. A chuti zing lai in i maban naicha ah Krismas imat nading uh tawh kisai in zia anuai ah Pathian thucha tamlo te ngaitua khawm in i Pathian in nang leh kei tatna dinga zia khawvel ah hun ahung mat sunga a dawitel na mak leh lamdang te hi vak ngaitua hitiu.

A inkuan tel: Khawvel ah hung piang thak/piangkit di hi tale chin kuate inkuan apat ahilo leh bang inkuan apat pian la nuam diam? Khenkhat te chun mi hausa ‘billionaire’ inkuan apat bang, khenkhat te’n solkal ah thuneina sangtak chawi inkuan apat bang,

Hinṅa Vâk

ahiloleh khenkhat te'n khawvel pumpi hiat mi minthang tak inkuan a kipat bang pian nuam ngei hitiu. Mosi dan a chun cha pawsal sūlhawng ah piang chu belamno ah tat di ti a hi. Belamno le nei zo lo ahiu chun vakhu a hêm vapal tuak khat hem in a tat diu ti a hi. Unaute haw, i Lalpa Jesu'n zia khawvel ah a inkuan dingah ala tel te hi belamno nasan nei zo lo khawp ah genthei inkuan te ala hiu hi. Tuni hin i kham kham ah nei leh thupi i kisaknate'u hi Pathian in ei dem nawpna leh ei nawlna a hizaw kha diam kienthak kit hitiu. Pathian in lungthim dik leh tawmte a tel zawsek hi.

A pianna mun dingah a tel na: Khawitak mun ah piang lahêm ti vak kingaitua kit tia. A tamzaw te hi chu inmun a hêm, hospital a hêm, ahilo leh Nursing home changkang deu ah piang le himaithei ihu. Ei bangma le hilo te bawn zia gual munte ah piang ihu chun lei leh van lal chapa i Lalpa Jesu Krist pianna ding a chun leng inn thupi tak sungah hileh kilawm lo di a hêm maw?

Maleh Pathian in lei leh van lal pian ah a lupna dingin thingtang khua Bethlehem ah gan an piakna kuang a hun tel mai hi chu a mak a hi. Jesu Khrista pianna leh lupna hi mi genthei tawpkhawk ten le a nausen lupna dingah a dawilo uh gan an piakna kuang a hi. Pathian zalin i chenna khawvel le hung khangto zel in Thagau lam thil thu ah le i ho leh biakna in te, zia ban ah chun eima mimal inkuan chenna in te bang le a hawi leh changkang theipen nei i nuam chiat hi a kipak um a, khantona khat le a hi. Ahin ngaitua thak dingah pha chu ho leh biakna Biakin hoi tak tak leh a sungah i thil nei uh changkang tak takte leh, eima mimal in di thupi leh hoi tak tak i sakteu hi a sungah Pathian Thagau a cheng in a awpkhum tak tak zing na'm ti hi ngaitua thak leuhin nawp a um hi. I kichaposakna dingah in leh lo, ho leh biakna In thupi tak tak nei ah Pathian Thagau in a chenchil lo hi sangin mawl milmial ah kingainiam takah taksa leh Thagau ah khawsa ah Pathian Thagau chenchil zing

hi chu a nawp um zaw a hi.

A tawpna penah a tel vang hi chu: Zia khawvel i nutsiat ding kuan ah, i thi dingdan tel thei di hileu hin bang gual ah thi i tel diam uh? Tulai hun ahin ipmu lum iti te bang, thakhat ah kipuk phut ah natna he manlo ah thi te bang vangpha i sau ah, ahi him le a bang hi. Kuama natna haksa tak leh genthei umtak thuk pum ah thi chu nuam puana. Nawp leh chawldam tak, vantang ngai ah le kilawm leh za um takah thi chu nuam chiat hitiu. Ahin lah, nang leh kei zia kah lei leh van lal in khawvel ah lampi a zui dingah a tel hi a mak hi ti lo thei a hipuai. A mualpho um theipen, a haksa leh a genthei

um tawpkhawk pen ahun tel ziang hi chu.

I thukhakna ding in, tuchung i maban naicha ah i Lalpa Jesu Khrist pian champaha i matna ding ahin i hun chiasa nungthil kit in, tu tiangah Lalpa'n a malsawmna tawh hing leh dam ah hun mangto thei nalai dingah ahun kawina pat in mualpho, genthei leh haksatna ama zia kin bangzat i thuk mawng mawng tam ti kingaitua thak in ama a dingah i ginum zawlonate, imualpho pi ngamlo nate, ama min zia kah haksatna i thawk peilo nate leh i chaponate a pat Lalpa dawidan zui thei ta dingin simtu zosia Lalpa'n ei malsawm chiat ta hen.

THAGAU A GILKIAL

Mathai 5:3.

Thagau ah gilki al ah hawl tũntũn hi pathian lungawi na a hi, zia gual mi chu thagau in ava sek ui.

Kial leh dangchak thei talo ihi chun kingaitua a ngai hi. A hingte nana na chu a kialin a dangchak sek ui.

Maleh kakial hi ti ah gamtin nekkuat hile thi theina a hi

Tulai phone velah sermon ngaiah biakin lam ngaisak taloah a huntawkah kikawi ziang hile an tampi nẽ hatna mang diaklo gual a hia, hĩvei khat chu nei hinah, kingaitua in a phai

I biak In ngeiah thagau an hawl hi a pha a detin a ga sek hi.

~Vk. Thanga

KAP MASAN LA A ZAW LEH LAM IN

*Rev. (Retd.) Lalkhosiak
Neihisial veng*

Lâm masat ah a nungah kê sangin, kê masat ah a zawleh lâ chu a nuam zawi. Nuam takah hinkhua mat ah, a nung ah genthei takah hinkhua mat chu thil da um pen a hi. Thil him him chu amasa ding aum ah, a nunung ding aum chiat hi. Khuti chu hilo ah, a kilebul khak chun thil diklo a suakah, mat theilo tina a hi. Gingtú Kristian hinkhua a hin le ziagual thil kilebul chu a um thei hi. Pathianin I mau pui intin kum 2021, 25th December Krismas hi kipak taka I mat chiat uh kinem in, Khristmas mat hun ah lunggil a chamzing ding a ka dawi ma ma suklat ka nuam hi.

A chiata 25th December 2020 kha i gam ah natna hî phalo tak (Covid-19) a len ziakin, khawvel ah kochuam tamzaw te chu khristmas mang theilo hi dingin ginchat a um hi. Kei ngei le mang theilo ding ah ka um phat in, nikhat chu Jesu pianna thu Bible chang hawlkhawm in Bible simna hun khat ka mang hi. Isai 53na ah Jesu hung pian dan leh haksatna a hun tuak ding dan Isai in a la genlawk hi. Ka ngaitua leh lungthim kipakna leh giksakna mittui tampi a luang hi. Ziaziakachun

tuchung Khristmas thupi dingin, ‘*Kap masa’n la a zaw leh lâ in*’ ti hileh ka nuam hi.

Isai 53:2. Ama chu tang gawchak ah thaichi no kek, zung thadawkah hung khangdawk gual hintin, vak etlana dingah mel latdan chuam bik leh, za umna a nei pua’n; dawichuam a hina dingah mel putdan chuam le a nei puai.

Zia thu Isai in a gen gual ngei in kum 2000 vel ala liamta khan Judea gam Bethlehem khua a chun Lalpa Jesu chu

genthei takin a hung piang tai. A thawkgimna thu dang genlo in a pianna thu tamlo gen hitiu.

Isai in Khrista hung pian ding chu, lei keu lakah thaichi mu hung kek dawk gualin a gen a. Lei chek lak ah thaichi mu a kek vak a, a khan le a khang thei hi. Lei keu lak ah thaichi vang chu haksa takin a kek ah, genthei takah a khan gualin Lalpa Jesu ngei chun le a pian a pat a thi tianging haksatna leh engbawlna a tuak hi.

Etsakna'n khua pakhat a hin, In khat a teksepi leh a tute pani a um ua. Nikhat chu vangsiatum takin, kawtbul lam a pat hung kipan mei chun In chu a hung kang ta. Teksepi leh a tute pani chu suk na ding hialo in a buaisia tau a, a tawpin a tute pani chu meikuang lak a pat chun a taidawk thei ham ham ua. Teksiapi chu beidawng in Insung lam ah a tai lut ah, thi ding kahi ta ei tin a kap ziang tai. A Inveng te'n a hun del ua himaleh meipi hat ziak ah chun a panpi thei puau. Zia laitak ah chun khawlai ah tangval melpha tak mai khat hi a hung a, teksapi ka thawm a

hiat phat chun, meipi lak chu a pal pheii a, teksapi kap lai chu a nungjang ah hun puan a hung taidawpi tai. Zia tangvalpa chu melphatak himaleh mei in a kat ziak a chun, a mai, a khut leh a keng haw chu a kang dup zo tai. A mel et in dawina ding him him a um tapuai. Lal Jesu dinmun Bible ah kigen hi tawh a kibang na e maw!

Tichun mipi leh teksapi chun a hukdawk pa melsiat dan chu a et thaw mai tau. Aleh, teksapi chu zia laitak chun kipak in a lam diam? Lam hial lo, tangvalpa chu a kawi a, 'bawipu kei zia kin la genthei na lawm lawm e maw!' ti'n mitthi a biang ah thiak sen lo a luang in a kap hup hup mai hi. Khrista'n ei ziak ah melmamg hial ah zep thuakin, leh thiamlo chansak a um in kraws ah khetden ah a um mai hi, banggual ah um ding i hita diam uh le! Gelthak kit hitiu.

Tichun tangvalpa chu In khat ah pui in a damna ding in a sungkuan un a buai pi tau a. Me tuitak a huan piak ua, an neipi in a chung ah kipakthu gen in a lam del del tau hi. Ka hun a

Hin̄na Vâk

um ah, nui hun, lam hun a la
um a hi vei maw. Khristmas
mat hun leh kikhawp hun sin
ah lâm chule a dik puai vang

ka ti puai. Himaleh Khrista
thawkgimna hezing kawm
in hun mang lehin Lalpa
lungdamna hin a.

Unaupa Ralngama la phuak vak en hitiu;

Ngailo lah'em Hukdampa,

La van khawpi tualnuam chu;

Bang dingah gankuang ah hung lum mai;

Ka ngai hi ka van khawpi,

Maleh la gitlo ziakin;

Lei thim ah vakvai ka hi a ti'i.

A dik ngei mai maw! Lal
Jesu'n van ah mun leh nawpsak
na ding neilo a hi pua, nang leh
kei soal ziakin lei ah genthei
thuakin a hung piang a hi zawi.

A tawpna dingin Jesu hung
pian thu a la ngai kit hitiu.
A pian hun hi phalbi daplai,
zankhawsawt hun a hia, Inlum
in a piang puai, bawngbuk
sung ah gan an piakna kuang
ah a sial ui. Ei haw a neilo pen
inle van lum thei pen in i kivan
ah, zan leh puan lum thei pen
pen ni leh thum(2/3) i sil lehle
dap kisa nalai. Nausen Jesu hin
dapsa'n ah e! khalzin lai a hui
ah puan a lum kham tak chule
paw puan ti un, nausen leh a
nu leh pa genthei dan muchian

pen ding chu bawngpi leh a no
te hin au. Nausen hung enthate
kha ganchingmi, gamgiak
ma a hi ziak un a buaina'u
dawnzangkhai kham bangma
pezo puan au. Chun a gam
lengpa'n nausen sumang gua
a hi ziakin phatak ah dawn
manlo in Aigupta lam ah a
taimang pi tau. Lungsiatum in
la hia em?

Ei uh a chaga pen te le
zia gual lawm ah, pian a pat
gentheina thuak hi um dingin
ginchak a um puai. Lalpa Jesu
genthei thuak pum ah hung
piang a hi dan leh thi chan ah
thuakgim a hi dan I hia tau a,
Lalpa'n i mau pui intin 25th
December, 2021 Khristmas hi

kipak takin mang hiti un, a hinla zia program hi nuam takah nek leh chak siam ah hun i mat lai un, a pianchampha i lawp uh Jesu Khrista hi khawitak a, banggual dinmun ah um a h'em ti geldawk zing leu hin, kipakna hintin, eiuh a ding in malzawlna hin a. Kap masa'n la a zaw leh lam del del in. Khristmas Chibai.

Khristian hina diktak chu mitthitui kikhawlkhawm, lokaina langkawn tukchak zing chu a hi.~ Michael Catt.

Pathian thu a gen phatleh a mitthitui in a bible a vatkhum sek hi. George Whitefield

Mitthitui hi a tak tak a hia, nui hi vang a lem a hi nuam hi.
~ L. Thahgen

Kipak bek ziakin kaplo thei ka hi puai. ~ Teksiapi.

Sunday School manthai theina lampi 14

***A lemchang phat bep leh kai di.**

***La kai phatleh le vaigei deu ah tung in.**

***Kai ding zia in phunchiak sek in.**

***La chanaute masang in la hotute gensia sek in.**

***Sunday school ah mawpuakna taphawt nawl inla, la nawl lo tawp inle thulim-lo tak in bawl sek in.**

***La zillai uh hiat gaw kin**

***La zillai ah la thatnawp lo dan kilat sak in**

***Zillai zilzaw phatleh zangkhai ma ma gual leh hun su pamai mai mai gualin um sek in.**

***A hung kai thak aum leh kihiatlo sakin, amau umna ding a hilo dan hiatsak in.**

***Ngaidan thak aum sin leh gensia masapen in pang sek in.**

***Genkhawmna zosia in nang ngaidan bep chiapi in a dik pen hi gua zing in.**

***La chate hotute chu kisala leh kithiamsak gualin kawi sek in.**

***Hotute pha lasakpi lo dan leh la pawmpi lo dan kilatsak sek in.**

***Sunday school a dingin kipiadaw ziang kin, midang bawl dingin kawi in.**

JESU DIN MUN UM LO MAW?

*Upa D. Kappa
Buallian Kochuam*

Khual Bûkah mun â awn taklo ziaikin gan ankuangin a sial tau hi. - Luka 2:7

Unaute haw, i hinkhua ah thilpawimaw ma ma i ngaitua diinguh chu Lal Jesu'n i lungthim ah mun a chang nam? Van ah Angel te'n a pakchim theilo uh, nang leh kei gitloah kumtuangah mangthai ding, ei lainat ziaakah i thi sikah thi dingah, a van lopina nusia lei mun nuainungpen ah kingaitawm takah gan ankuangah hung lumpa hi. Ziagual lawmah kingainiam, pianna ding In na ngawn le neilo ah nang leh kei ziaakah hung vakvai hi tuni tiangin la lungthimah mun chang nailo a h'em? Nang leh kei ei ngaikhawk dan la phuaktu chun,

“Ngailo la hem hukdampa, la van khawpi tualnuam chu, Bang dingah gankuangah hung lum mai? Kangai hi ka van khawpi maleh la gitlo ziaikin lei thimah vakvai kahi” a tia.

A hepina chun a tawpkhawk a hi. Tuni hin Lal Jesu'n, ngaitia kawtkhak bulah dingin kakiu zing a hi. Kuale ka aw hia kawt ei hawn chu a kiangah lut ingka tin, a kiangin zan an ne'ng ka tin, aman le ka kiangah ne'n ah. Unau tuni hin Lal Jesu'n kingaitawm takin la lungthim kawt a kiu zing hi. Hun pha la neilai in kolut kingang in “Jesu tuni hin kalunggil uh bawngin ah hung piangthak kit in, nang ka kumtuang Lal dingin” ti'n la lungthim kawt hawng le chin hun umpi in hun chenchil intin kipakna bukim nei ta'n la.

Aw eihil in a thukdan hi. Gan ankuang leh hansiadawl thing. Lei eden leh van Lallukhuk. Salemthak a kizawpdan hi. Simtute Lalpa'n malsawm ta hen.

December 2021

CHAMNA THU LENG TA HEN

Luka 2:14

*Rev. Malakia Lalnunfela
i/c Mata Pastor Bial*

Kristiante a dingah hun kipak um leh i ngakla ma ma sek uh Khrismas i tung kit tau. Thiamzilna ziaakah mundang ah um te, nasepna ziaakah sungkuan umkhawm theilote le Khrismas a hin umkhawm i nuam sek ua, gam gamla tak tak patin inlam i zuan khawm sek ui. Khrismas hun a hin chu gam changkang tak takah khawsa himaleuhinle pianna vangkhua thingtang tak tak himaleh i chia nuam tei tei sek hi. Khrismas hin i lungthim luadim in, sungkuanah matkhawm tei i nuam ui. Kochuam le i kisingsa, gan that ah, luaithena bawlin, lim takah hun mat ding nawpna'n sum leh pai tamtak i seng sek ui. Kochuam kikhawmpi chun Khrismas hi ursun takah mat pha a sak ziaakin Khrismas ni ah le sa that loin, Pathian Biak kikhawp guanggal dingin thupukna a siam ah, tuni tiangin Khrismas niah luaithe a hilo ziaakah lungawi thei ma ma lo le um i hi tuak ui. Khrismas ah hin bang hi a pawimaw pen em ti ngaitua ngai a hi.

Khrismas chu thumal pani Christ leh Mass ti a pat hung pawt a hia, Khrista luai tina a hi. Zia Khrista luai hi bang ziaakah hung um a, bang dingah hung um a, kuate a ding a h'em ti ngaitua khawm ding ihu.

Mihing سواله puk, Pathian tawh kikhent ta chu hukdamna a chan kit theina dingin ama

leh ama a kihukdam theipua, kumtuang hinna nei kit thei dingin bangma a bawlthei puai. Pathianin khawvel a siamlai khan mihing chu ama kibatpi in thiangtho in a siam ah, himaleh pukna ziaakin zia thianthona chu a mansua tai. Mihirng hina zosia chu a buak tak ziaakin Pathian mit a tung zo ta pua, Pathian leh mihing

Hin̄na Vâk

chu a kizawpmat thei tapuai.

Pathian leh mihing chu a kizawp kit theina ding, khawvel siamtil a kipat a hina gual tak pu kit dingin mihing chu siamthak a ngai ta, zia hukdamna lampi chu a hung tun theina dingin a chapa neisun Jesu chu khawvel ah a hung pian sak ta a hi. Krista luai chu i gitlona ziakin, nang leh kei a dingin, hukdam i hitheina dingah hung um a hi.

Lal Jesu a pian thu Bible ah i mu gualin, v a n s a w l c h a k leh van mipite'n pakna la a sak thu uh mu a hi. Zia chun Pathian chu lopina leh chawihawina a piau. Krista hung pianna hi Pathian lopina ding a hi. Kingaitua ngai chu, Khrismas i mat danah hin Pathian a lopi em ti hi kidawng hitiu. Khrismas chu Pathian lopina ding a hia, chungnung penah a umna, chawihawi a hina ding a hi. Khrismas i mat dan, kisingsak dan, sum sen dan, lunggil ngaitua dan zosia hi thîl in, Pathian a lopi penna dingin i lunggilin kisingsa hitiu.

Vân mite leh vansawlchakte'n Pathian a chawihawi zaw un lei chungah Pathian in a kipakna ma ma te kiangah chamna thu leng ta hen ti a hi. Khrismas hi Pathian mite a dingah chamna tunna ding a hi. Van leh lei kikal, Pathian leh mihing kikal chu a kizawp kit theina dingin Lal Jesu a hung piang a, zia palai nasep sem dingah hung piang chun chamna a hung tut hi. Chamna thucha hin Pathian leh mihing kikal bep hilo in, i

Pathian leh mihing kikal chu a kizawp kit theina dingin Lal Jesu a hung piang a

mihing chanpitem tawh i kikal le a huap hi.

Lawi leh pai tawh

kikalah kituaklona leh kihiatthiamlonate, kicham hitiu; i suapi unaute tawh kilemlonaineichun, ngaihtuana thak nei hitiu; i sepkhawmpite tawh i sepkhawm theilo chun, kisiampa hitiu. Insung ah kiho theilo i um chun, kingainiam zawkah pangin panla thak hitiu. Ziagualah kingaidamna leh kingaitawmna munah chun Krista luai umkhawm hiti un, Khristmas diktak chu mangthei ding i hui.

December 2021

CHIBAI BUKNA DIK

Mat. 2:9-11 ; Luk 2:15-20

Rev. Th. Samuel Vaiphei
i/c Phaipheng Pastor Bial

Thumapui:

Kum hung kihei zel in Pathian mapuina zalin Lal Jesu pi-anchampha thil kit thei nalai dingah i um ziakun Pathian ki-angin kipakthu i gen uh a hi. Khawvel hi chu buaina lam manawk a hi tihi gen ngailo in a lang zing a. Khawvel buaina hin nang leh kei hi buai sek maleu hin le Lal Jesu Krista chu lopitak in Pathian Lalchutpha huangsung a pat chun kumtuang dai lalna chu a sem zing hi . Khawvel lengte chu a hung lal un, chawmkhatlo kal in a mangthai kit sek uh a hi. Ziaziakchun tu chung khristmas hun ahin Lal Jesu Krista'n hepina ziakah ei hukdam dingah hung piang hih i hinkhuau ahin bangti'n chibai buk ding ihu em ? tihi ngaitua khawm leu hin dawi um chu a hi.

Matthai 2:2 na khan Miching pathumte chun hiti hin a gen ui, 'khawi ah a h'em Judate lengpa chu?' Zia hin Jesu chu a pian apat lal a hina a sulang a, ama chu lal hi dingah hung piang hilo in a pian ni apat lal a hi. Kristmas hun ahin gingu tam zaw hin Jesu hi piting nai-lo nausen gual maiah ngai in, ama hi thina tiang tuak a hukdamtu a hi tihi i gel pha sek puau. Jesu nausen chu lung-

siat um, dawi um tak a nu leh a pa'n a zam vel pi tawl tawl in i ngai ua. Ahinla thilkhat i hiatmil lo dinguh chu ama hih Leng hisa piang a hi ziakin Herod chun a lungzinpi a hi. Lal chu a hung a hi, khawvel leng gualte gual mai hilo in. Bible chun hiti hin a puang a, Jesu chu "Lalte Lal" a hi ati a hi. Zia chun a etsak chu, kimgaitawmna zosia tawh van Lal chutpha chu nusia in, Beth-

Hingna Vâk

lehem bawng in a chun vai a hung hawm pat a hi.

Tuni CHIBAI BUK thumal hih sap pau thumal ‘WORSHIP’ apat ledaw a mat a hia. Worship thumal tak hih bang tina a h’em? “I chung lal, thupi, thunei, lian leh zaum zawte chawisangna i piakna a hi.” Zia chu zana, ngaisang taka, dawium taka, ngaina taka, lul taka, lopi taka leh chawihawina sang pen i chung a te chung ah taklatna hih a hi.

Thuthung thak (NT) ah chun a tangpi in Worship thumal hih Greek pau apat thumal ‘PROSKUNEO’ zia chu, zana leh ngainat zia kah chawp (kiss), a khut chawp ahiloleh baw khup, a pum a pekah a khuplam a kizam ah zana i bat i piak ding dawlte kiangah i kituklutna a hi.

I genchian nuam pen a hi leh chu Chibai buk (worship) hih kipiakna – Pathian chawihawina leh zana i piakna hih a hi. Ziakiakchun, gingtute chu Pathianni a h’em, Nibik ni a h’em ah Biak In lam zuan in i chia khawm a hi. Thugentu,

La pawl sate zana pia dingah, ahiloleh lasa khawm dingah, Mawpuakna sukbumna, mi mitmu ah kilawmlo sak zia k a h’em leh a dang dang zia k a chia khawm ihi puau a, Pathian ho ah zana pia dingah chia khawm zawk ding a hi. Bang gual a Pathian chibai bukna chu pia thuk ding i hui em? I piak thuk dan dinguh pathum te chu vak gen hitiu.

Herod thu piak thuk dan:

Herod chu mani masial tak mi a hia, ama a ding bep bep ngaitua leh khual mi a hi zia kin zawlneite genlawk Messia Judate Lal hung pian ding thu Saklam mipilte a pat leh lekhaziakte a pat chun nausen Jesu pianna thu a hiat phat in a lungzinpi ta a hi. A Lalchutpha chudawk thei ding dinmun thil um chu a ngaithei ta pua. Ziakiakchun Nausen Jesu chu thalup gua’n thu a guanggal ta a hi. Mi tamtak a dingin haksatna leh thi leh mauna a gamah chun a tun khawlaw ta a hi.

Ziagual ma chun tulai mite’n le gingu kahi tih tamtak t e’n ka hinkhua chung ahin lal kahi

ti in a dawidan un hinkhua a mang uh a hi. Ka hinna hi kei a ahin, ka thu thu'n hing ka ti'n kuama'n ka chungah thu nei thei puannau a tiu hi. Ziagual mi chu Herod a hi.

Herod chun Lal Jesu chu ama lawkna ding bep in a dawi a hi. Nang leh keile zia dinmun ahin, hun tamtak ah, i phatchuamna ding a hi chun, i lunggul sek bep uh a hi. Nat leh damlo hun ah damna dingah, zi leh pawsal nei hun ah, cha leh nau nei hun ah, sep leh bawl ding hawl hun ah leh khawvel ah i thiltup mualsuana ding hun ah te hin panpitu dingin i ngaicha sek uh a hi. Zia thil zosia hi ka nei phat leh hung zui ingka tihi i thupi a hi pen hi.

Thiampute leh Lekhazikte te thu piak thuk dan:

Thiampu liante leh Lekhazikte chun sualam mipilte (Magi) apat chun Judate leng nausen Jesu hung piang ding thu chu a hiat phat un zawlnei lekhabu Micah 5:2 kiziak chu phet dawkin Jesu Bethlehem ah hung piang ding chu a sim dawk tau hi.

A mau suangtua gualah leng leh lal in ah a hun pian taklo ziakin a gingcha puau a, a lungguh le a lut ta puai.

Lal Jesu ngaisaklo tamtak aum lai in, gingu Biak In zuan zingte pawl lak in tamkhawp tak i um tau hi. Nuamlo pawl um in ah, ahin lunglut tak tak zolo deu chu i hiu hi. I nileng hinkhua a dingah i hun mat nau a hin i ngaituana'u tamzawte i piazo tau hi.

Damtheina ding, i nasep ding, Insung leh pawlam ah mi tawh kipawlkhawmna, sum leh pai dinmun ngaikhawkna ah, nek leh dawn leh i taksa cheihawina ah te hin i hinkhua uh hun a la zo ta a hi. Khawvel a thilte ngaisangna leh nawpna hin Lal Jesu chu i hinkhua a hin mun a chang zo talo a hi. A khawk khawpmai chu a hi. Pathan thu i hiau a, thu gil tak tak thute le i holim thei ua, Kochuam kivaipuak dan thute le i hiau, ahinla Jesu tawh kizawpmat leh thuawi takah ama tawh umkhawm chu i nuam puau. I dawi dan chiatun Lal Jesu chu chibai i buk tau hi.

Hin̄na Vâk

Michingte thu piak thuk dan:

Miching pathumte chun Lal hung piang ding thu chu a hiat phat un, ngaikhawk leh than-uam takin a hawl uh a hi. Su-alam gam gamlatak patin, hun leh phat leh sum leh pai tam-tak sengin leh haksatna tamtak tuak malam in a hung kipan-dawk uh a hi. Lal hung piang chu mu masangsia hawl dingin a kipia uh a hi. Aksi lamdang-tak chunglam vak chu ginna'n kinga in ahun zui ua; Jerusa-lem Khawpi sung a hungtung tau ah; Lekhazikte hawl in thu dawng chian malam in Bethle-

hem lam zuan in Nausen Lal Jesu a nei zosiau tawh Chibai ava buk tau hi. Zia chu a hi Chibai bukna dik Gingtute'n i bawl dinguh chu.

Lal Jesu ah la lunglutna chu Herod masialna gual a h'em ahiloleh Thiampu liante leh Lekhazikte ginglelte gual a h'em ahiloleh Miching pathumte lunglutna diktak gual a h'em? Tu chung Lal Jesu pianchampha i mat kitna ding hun a hin CHIBAI BUK-NA dik tak tawh Kristmas mang chiat hi tiu. Pathian in hun umpi zing ta hen.

Lekhaleng kua'n a lensak a h'em?

"Kei kahi," mawlkang chun a tia. "Kei kahi," lekha pek chun a ti kit a. Chapang pa chunle, "Kei kahi" a ti kit a. "A hipuai, kei kahi," hui chun a hung ti kit hi. Himaleh a palli ua kithua ah leng thei a hi. Mawlkang chu bawng in, a mei thingah kitang in, lekha chu kezkak in ahilo leh hui chu hang lo leh lekhaleng chu leng theilo ding a hi. A bawn ua panmun a nei chiat uh a hi. A kibultuadan in a etsak chu kihiatlosak thei a hi puai. Mizois'a'n sep ding i nei chiat ui. Pathian nasep chu a lawtin theina diingin, sep ding dawl i nei uh, mawpuakna i nei chiat teu chu suk pitin chiat a pawimaw hi. Kivetuana na, thilpiak, thugen leh nâ dang dang sep ding i nei zosia'u chu Kochuam leh a nasep suk pitinna dingin i sep uh a pawimaw hi. I sepkhawm ua i kithuakhawm uh a pawimaw takzet hi. Kochuam chu a pun ah sepkhawmna a hi. (IKo. 3:6-9)

KHRISMAS TAK MANGTU SAKLAM MIPILTE

*Rev. Ngurthanmawia sailo
i/c Imphal pastor Bial*

Khrismas i mat sîn ua leh chanchin i gen hiatmil ngailo uh chu saklam mipilte chanchin a hi. Khrismas i mat laisiau chu a chanchin uh gen haisan ni umlo ding hileh a kilawm hi. Amau hi a hung kipatnau le genlat a hi pua, kuate ahiu em ti le taklat a hi puai. Tuanthu khat achun mipilte hi India, Greek leh Aigupta gam a pat hung kipan in a gen kit ui. A min teu chu, Gasper (India) Balthasar (Aigupta) leh Melkior (Greek) gamah umte hi in a gen ui.

Khawsaklam mipilte chanchin a ngainawp umna laitak chu nausen Jesu chibai a buk dan uh hi a hi. Zia takah ‘Chibai Buk’ ti hi pathian gualah bia genna kampau ahia, ziagual ah nausen mai mai chibai a buk uh hi Jesu Pathianna a muchian khawpmai ui tina a himai hi. Tichun mipilte chun thilpiak pha pen pen, sanate, begawte, murra te a piau ah. Zia a thilpiak gual uh hi nidanglai ah a thil ngai thupi pen te a hia, ziagual thil lul tak mai nausen chibai bukna dingah a hung chawi uh khan zia nausen chu nausen danglam,

Pathian chapa a hinate namdetna a hi tithei inah. A thilpiak ua kipat hin a ettawn tak dan uh a muthei hi. Ziagual a chun Khrismas mang masa lawi khawsak mipilte chun gam gamla takah kipat hung kalsuan in za tak leh titakna tawh nausen Jesu chu chibai a hung buk uh a hi.

Tulai Khrismas i matdan tawh tekhin in kibang lo mai thei a hi. Tuhin le khawvel hi Khrismas mang dingah a kisingesak laitak a hia, mi tamtakte chu Bethlehem Lal Jesu pianna mun ngei taw dingin ki singsa sau sau intin uh, ziagual

Hin̄na Vâk

chun mitin in i thei dan dan in kisingsa chiat tho ding i hiu a. Himaleh vak ti'ng ka e, tulai Khrismas matdan hi chu mani limna leh kipakna ding bep i ngaitua zaw ta uh hi in a kilang hi. Krsitmas (Khrista luai) i tiu a, zia i Kristmas mat hin Khrista lam hilo in a luai lam zawk hi i ngai thupi zaw mai sek ua. Luai ti hin nek ah nek thaw ding tina hi khel lo in Kristmas in a chunkhawp kha a pang hi ti hia hitiu. Khrismas i mat dinguh hin Khrista i buai'pi'u em ahilo leh zia ni a dingah kivanna ding puan? Ngaklak/tanglak lai a chun kicheina hin i lungthim lua dim in i ngai thupi ma ma sek a, kicheina ding van thak i nei-lo zia kah Khrismas mat ding thatdana leh haksa sat hun a tam ma ma hi. Himaleh i vanthak neite hile Khrista zia kah bep ah nei thei ihi ti hezing kawm ah i Khrismas mat dinguh hin Khrista kawi pawimaw pen a pawimaw khawpmai hi.

Khenkhat chun Khrismas phatleh Khrista sangah ti thim thim te haw i buai'pi zaw mai sek ua, matkhawmpi ding

umlo zia kah Khrismas mat bukim zolo kisa ma ma ah kihia pawl le a bei puai. Khenkhat taget chulah kochuam program ngai pawimaw keilo, lawite tawh daipam deu ah vak chutkual khawm se se thanuam i um sek hi. Khatvei chu pa pakhat hin a chate kisuklimna dingin a huangsung ua kihelna mun nuamtak a siam piak a. Zia takah chun a chate chun lim takin hun a mang ua a pa pen uh chule a lak un pang in, a chate kihel chu a en sek hi. Tichun nawpsa ma ma in naupangte chun a kihelna dinguh siampiak a pa pên uh chu hemil hial in hun a mang sek ui.

Kihelna mun siampiak pa pên chu a chate'n a hiatphaklo phatun ti hin a gel tai, 'a hiti zing leh phalo ding a hi, ka chate hin bangma'n hung mulo khawng di a hiu e,' ti in a kihelna mun uh chu a suksiat piak tai. A chate chun a kihelna'u suksiat piak a hi zia kuh a hiat phat un khawk a sa ma ma ua, maleh siamphat kit thei a hi tapuai. Tihin ka ngaitua mai mai a, zia gual lawm ah ama

sâng ah limpi zawk i nei sek te, buaipi zawk i nei sek te ziak hin Lal Jesu lungthim hi a na diam ti hi a hi. Kei leh kei ka kichan chun ka lungthim a na ma ma hi. Nanguh hileu chunle la lungthim uh na ma ma in a. Kei ni ta ila chuan ka rilru a na ngawt ang. Khrismas umlawna pen Khrista hephalo ah hun i mat hin Khrista hi lungthim na ngawi ngawi in um ding a hi.

Ziaziakchun i Khrismas mat dinguh hin eima kipakna ding bep hilo in Lal Jesu kipakna ding lam zawk hi ngaitua nasa

zaw hitiu, Khawsaklam mipilte'n le Krsita kipakna ding a hawl ziakun gam gamla takah kipat in sum tampi seng in nausen Jesu chu chibai buk dingin a hung ua, zana chibai buk in thilpiak lultak leh phapen a piau a, ziaziakchun amau chun Khrismas tak tak a mang tau. Ei unle Khrismas tak tak i mat theina dingin, eima leh eima kipakna ding lam hilo in Khrista kipakna ding zawk hawl hiti'un, thilpiak ding go lul tak neilo malehin le i go lul leh mantam pen, thinlung go bawm hi hawng in ama chibai buk leu hin Khrismas tak chu mang hi ding i hui.

Khrismas ahin Khrista chu la gêlpha na em?

Tumasang deu akhan, University thupi deu mai khat ah psychology professor pakhat chun a student mi 40 te chu patep dingah a kisa. "Khrismas" ti thumal hi zik un atia, tichun a zik vek tau a. Tuhin zia "Khrismas" ti thumal zaw ah chun zia ni tawh kituak in la lungthim un bang a hung kilang masa pen em, a kilang masa pen pen chu ziak un a tia.

chawmkhat zaw ah paper te chu a lakkhawm zaw in a en ah, zia gual hin "Khrismas" thumal chu a belap ui: 'tree', 'presents', 'turkey', 'holiday', 'carols', 'santa claus' tite in, kuama chan "Jesu pianni" ti ah hung zik a um puau.

khualbuk a chan zawlo gualah khan tulai hin le Khrismas matna hin mun a chang zo talo a hi.

KNP HUANG

CKNP Vaihawm Kikhawp 7veina 2020 thupukna ah Delhi leh Guwahati Kochuam te ve ding phasak himaleh covid pandemic zia kah lockdown a hung um zia kin thupukna bawzui theilo ah hung um in 2021 CKNP khawmpilian thupukna ah ve ding in pha sak kit a hi dungzui in November, 12–19, 2021 sungin Pathian mapuina zalin Pi Neikhovak, Ex-Chairman(2019 -2021) leh Pi Chinglalven, Gen. Secretary ten Delhi leh Guwahati Kochuamte vena nei a hi. Pathian mapuina zalin Kochuamte vena hun ah thagau lam leh taksa lam ah kithuakhawmna lawktak in mat a hi.

Delhi Kochuam ah Nov. 13th ‘21 ni’ n Seminar mat a hi. Seminar paper topic te:

1. Leadership training cum seminar
2. KNP Kikaihuaina Dân
3. Khristian Insungkuan leh Nisin Insung Kikhawpna
4. Anchangham

Nov. 14th ‘21 Pathianni Biakna kikhawpna ah ‘Khristian Sungkuan’ ti thupi ah mang in Sermon Pi Neikhovak, Ex-Chairman in a nei hi. Delhi kochuam hi October 15th 2017 ah kiphudawk a hi. Member zosia zat 132, KNP member zosia zat 54.

Guwahati ahin Nov. 17th ‘21 nitak ah Kochuam puitute tawh Pastor Quarters ah kipawlkhawmna hun mat ahin Nov. 18th ‘21 in seminar lawktak in hun mat kit a hi. Guwahati Kochuam din patni hi 06.01.2019 a hi. Kochuam member zosia zat 59, KNP member zosia zat 21.

Delhi leh Guwahati kochuam i/c Pastorte le a fel khawpmai ua, Kochuam mite le a fel thei ma ma ui. Seminar topic te ahin le a lunglut khawp mai ua kipak a um takzet hi. Kochuam mite kipumkhat dan hi a ettawntak khawp mai hi. Maban ale Kochuam chiazelna dingah zia sangah khangto zaw dingin Pathian in malsawm zel taken.

Lalpa’n lopina zosia chang ta hen!

~Pi. Chinglalven, General Secretary CKNP

*P*athian puihuaina changin, hun bangchan a h'em KKP in activity nei theiloin um ma leu hin hun thawveng zaw chang thei in, kivaihawmna thupuknate bangzat a h'em sem pit-ing thei ah a kiumtak ziakin lopina Pathian i pia a hi.

Tuni hun tiang ah CKKP malatna ah sep buting thei chu ziate hi a hi:-

1. **Leadership Training** neiding ti ah guanggalna umsa kha gamsung thawven lo ziakin nei ziang thei in aum pua, committee chun video siamah online/YouTube ah thadaw hihen ati gualin resource person te— Rev. C. Lalngaihawma, Rev. K. Neihzial leh Pu. Lianboi te chu video hung siam dingah chial ahiu ah, amau inle, khanglaite a ding ngaikhawkna liantak neiin theitawp sua in pan a hung lau ah, video chu October 16, 2021 nitaklam in Central Khristian Khanglai Pawl, Manipur Area YouTube channel ah thadaw in aum hi.

Video hi “Leader hina leh mawpuakna”, “Secretary hina leh mawpuakna”, chuleh “Financial accounts etkawlina” ti te ah khen a hi. Zia video link hi Bialtin KKP Secretary te kiangah thawtdaw ahi; bial sungah a ngaitha leh hia dingah kilawm dawl te kiangah ala kipia sawn dingah kineppi a hi'u.

2. **Vocal training** nei ding kiti kha a chiata October 29, November 9 leh 19, 2021 nite in Rev. Nicky Lalremmawia zilsakna nuai in nei a hi. Zia hunsung ahin bialtin ah kipat mi 3 zel pang ding ti a hi. Ahinla, lo nasep leh bu lak hun khawk laitak ahi ziakin dawigual in a pangthei a tam puai.

Vocal training na mun hi Hilltown Kochuam zintunna ah Gospel Centenery Hall ah nei ahisek hi. Zintuntu Kochuam leh KKP in kilawm tak mai ah a zintun ban un banner leh thingpi, nekthei (refreshment) a hung tuakpiak bawk ua, kipak um a kisa ma ma hi.

Hiṅṅa Vâk

3. **Inter-Branch Bible quiz competition** audition round chu a chiata dt. 13 November 2021 ni in Munpi, Jubilee, Hill-town leh New Lambulane Kochuamte zintunna in presbytery palite ah a kinei thei hi.

Final round ah pang dingin Chongkhawzo, Buallian, Kangvai leh P.Thianzawl Branch te teldaw ahiu ah, quiz competition final round hi Jan 14,2022 nitaklam dak 6:00 leh AS Office, Thangkai- Lungpau hall ah nei hiding a hi, live ah et thei dingah thadaw hi ding a hi.

Quiz competition a ding question ei guanggalpiak Rev.Thianneilal leh Rev.Thangtinlal Vaiphei chuleh audition round ei zintun kochuamte kiangan kipakna a sang takzet hi.

4. **CKKP malatna Orphanage Home vena** neiding thu chu committee in bawzui in Home vethei dingah etthak palite (4) lak in committee chun Moreh ah um Jehovah Jireh Children's Home ve dingin pha asa, zia chu December 11,2021 ni leh ve hita ding a hi.

Zia home vena dingin Bial haw malam in branch tin ah kipat panpina, thilpiak ah hi henla, sum ah hi taleh tamtak a hung lut a, sum ₹148055/-, anchang chuleh van dang dang a hung lut hi. KKP in Orphanage phungvukna dingah i pankhawmnate'u hi a lopi takzet ah, kipak aum mama ziang hi. Pathian in ei malzawl zel kinep a aum hi.

5. **PYF Palai** : Presbyterian Youth Fellowship kiangah, CKTP haw malam ah associate member dingah dawtna a la kisiam chu PYF in ei pawm piak dungzui in 2021-2023 sung PYF Central committee member dingin Manipur Area KKP a kipat mi hung kisawl dingah ei hiatsakna uh chu CKKP in bawzui in, Tv. Haulemthang, committee member CKKP sawl a hi. Ama ngeile December 3, 2021 ni in Shillong mun ah charge kipiaktuana hun in a va pang thei hi.

Chuleh budget dingah hung kiphut Rs.12,200/- le piak ngal a hi. PYF in budget a hung phut hi KKP vaihawmna kinei zaw nungah hung kiphut ahi ziakin budget kisiamsa lakah kipat in piak ding a um pua, central committee chun sum umsa, opening balance ah kipat piak himai hen ti ah pha a sak dungzui ah zia PYF in ei phut budget hi kipia a hi. Kum kit ah kipat in chu KKP budget ah pansak hung ngai ding eitai.

Synod piting hi ding ah kalsuan zing lai i hi'u a, PYF tawh semkhawm thei leh zia huang ah chanmun chang thei ah i um tak uhi masawmna liantak a hi. Maban ale kalsuan zel thei ding in pauchapna in delzui hiti'u.

Tulai khawvel kihei dan thil in i masang hun ding gentiam a haksa, ahinla Pathian muang kawm ah kalsuan a pawimaw takzet hi. Kumkit 2022 hi General Conference hun ahi ta, khawvel dinmun hiatthei ahilo ziakin program siam ding dan leh zintuntu te a dingin le kisingsak lawk dan hiatthiam a haksa ta. Pauchapna tamsem ah delzui dingin simtute zosia ka hung chial hi.

Lalpa'n i umna mun chiat un ei umpi zing ta hen.

Tv. Lianlalsiam
General Secretary
Khristian Khanglai Pawl

“THILPHA HI DINGAH HUKDAM”

Editor : Rev. S. Lama Vaiphei, Co-ordinator
Joint Editors : Rev. R. Lalmingsanga, A/S
 : Rev. K. Jama Vaiphei
 : Rev. Hesei Vaiphei
 : Rev. Th. Samuel Vaiphei
 : Upa Lalminsang
 : Upa S. Lalpi
 : Pi Chinglalven, Secretary, CKNP
 : Tv. Lianlalsiam, Secretary, CKKP
Business Manager : Pu Lalbiaklian, A/S Office.
 MPCs Office D. Phailian
 P.O. Box 107 CCPur-795128 Manipur
 Phone No. +91 9089623251
 Email - *mparea@gmail.com*

Kum khat lak man : Rs. 100.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. Editorial	01
2. KOCHUAM HUANG	02
3. CHIBAI BUKNA	05
3. SERMON/KHRISMAS SPECIAL	
a) Kut lopi pen	06
b) Ei un le chibai buk hitiu	11
c) Khrismas chungchang	18
d) Dawitelna mak leh lamdamg	21
e) Kap masa'n	24
f) Jesu din mun umlo maw?	28
g) Chamna thu leng ta hen	29
h) Chibai bukna dik	31
i) Khrismas tak mangtu saklam mipilte	35
4. KNP HUANG	38
5. KKP HUANG	39

Hinna Vâk ah thu kisua zosia hi Editor ngaidan a hi suak puai

Pauchapna Thupi:



1. Rev. Hesei hi a damlona pat a hung dam thiang vak theina ding in.
2. Pastor ordained thak pani leh Pro. Pastor thak pathum i nei thei ziakun kipakthu gen hitiu.
3. I Revival speaker-teu leh a team-teu pauchapna'n delzui zing hitiu.
4. Khristmas lim tak ah mang ding leh Kum thak dam tak ah galkai chiat thei ding in Kochuamte pauchap hitiu.